


Primljeno 07.10.2015


U skladu sa Članom 7. Stavom (2) Zakona o kolektivnom ostvarivanju autorskog i srodnih prava (Službeni glasnik BiH 63/10), Članom 29. i Članom 49. Statuta Asocijacije kompozitora – muzičkih stvaralaca, Upravni odbor Asocijacije kompozitora – muzičkih stvaralaca (U daljem tekstu: Upravni odbor) na sjednici održanoj u Sarajevu 06.10.2015, donosi

PRAVILNIK

O FONDU ZA KULTURNE I SOCIJALNE NAMJENE

Član 1.

Pravilnikom o Fondu za kulturne i socijalne namjene (U daljem tekstu: Pravilnik) utvrđuju se uslovi, postupak, način prikupljanja sredstava, raspored i korištenje sredstava i ostvarivanje prava na sredstva iz Fonda za kulturne i socijalne namjene Udruženja (u daljnjem tekstu: Fond).

Član 2.

Fond čine sredstva koja se odlukom Skupštine Udruženja izdvajaju od naplaćene autorske naknade, odnosno tantijema autora i nosilaca prava za kulturne namjene i za unaprijeđenje penzijskog, zdravstvenog i socijalnog statusa članova Udruženja a na temelju Člana 7. Stava (2) Zakona o kolektivnom ostvarivanju autorskog i srodnih prava (Službeni glasnik BiH 63/10).

Član 3.

- (1) Visina sredstava Fonda ne smije biti veća od 10% neto prihoda Udruženja.
- (2) Odluku o visini sredstava iz Fonda na godišnjem nivou donosi Skupština Udruženja na svojim redovnim zasjedanjima.
- (3) Sredstva prikupljena za prethodnu kalendarsku godinu ulaze u masu za dodjelu iz sredstava Fonda u tekućoj kalendarskoj godini.
- (4) Omjer između sredstava određenih za kulturne i socijalne namjene može se mijenjati u okviru kalendarske godine u zavisnosti od potreba Udruženja.

Član 4.

- (1) Sredstvima Fonda upravlja Upravni odbor.
- (2) Za obavljanje tehničkih poslova oko provedbe ovog Pravilnika Upravni odbor može imenovati komisiju za kulturne namjene i komisiju za socijalne namjene koje će predlagati način raspodjele ovih namjenskih sredstava.
- (3) O korištenju sredstava iz Fonda Upravni odbor Skupštini Udruženja podnosi godišnji izvještaj.

Član 5.

(1) Upravni odbor raspisuje konkurs za dodjelu sredstava iz Fonda i objavljuje ga na službenoj web stranici Udruženja.

(2) Oblasti i kriteriji koji su obuhvaćeni konkursom :

- Muzičko stvaralaštvo (stimulacija domaćeg muzičkog stvaralaštva);
- Muzičke manifestacije (organizovanje festivala, tribina posvećenih novim djelima i naučnih skupova čija je tematika od značaja za domaće muzičko savremeno i tradicionalno stvaralaštvo;
- Muzičko izdavačko stvaralaštvo (izdavanje promotivnih kompakt diskova, objavljivanje partitura od značaja za muzičku kulturu, objavljivanje analitičkih studija i stručnih muzikoloških publikacija koje su od značaja za domaće muzičko stvaralaštvo).

(3) Pravo da konkurišu za sredstva iz Fonda imaju sva pravna i fizička lica sa teritorije Bosne i Hercegovine koja ispunjavaju uslove konkursa (u daljem tekstu: Aplikanti).

(4) Aplikant koji namjerava koristiti sredstva iz Fonda dužan je Upravnom odboru uputiti prijavu za dodjelu sredstava iz Fonda (U daljem tekstu: Prijava).

(5) Prijava mora sadržavati:

a) kratak opis programa/projekta iz kojeg mora biti vidljivo da se ostvaruje svrha iz Člana 2.ovog Pravilnika;

b) podatak ili potvrdu iz koje je vidljivo da li je program/projekt sufinansiran i iz nekog drugog izvora (npr. fonda, donacija ili na temelju nekog drugog konkursa), te da je neprofitnog karaktera;

c) izjavu aplikanta kojom se isti se obavezuje da će program/projekat realizovati u određenom roku;

d) saglasnost autora/nosilaca autorskog prava za realizaciju muzičkih djela koja su sadržana u programu/projektu a organizatori festivala je mogu naknadno dostaviti, do potpisivanja ugovora sa Udruženjem;

e) izjavu aplikanta kojom se isti se obavezuje da će u svim promotivnim nastupima u javnosti Udruženje biti pomenuto verbalno, na štampanom, promotivnom i svakom drugom materijalu kao i da će logo Udruženja biti zastupljen na cjelokupnom promotivnom materijalu koji prati realizaciju programa/projekta.

(6) Prijava se podnosi Udruženju u roku od mjesec dana od dana objavljivanja konkursa.

Član 6.

(1) Pravo na sredstva za socijalne namjene iz Fonda imaju svi članovi Udruženja, po osnovu zdravstvene ugroženosti ili po osnovu socijalne ugroženosti. Pravo na

sredstva za socijalne namjene iz Fonda imaju i najbliži članovi porodice preminulog člana Udruženja, pod uslovima predviđenim ovim Pravilnikom.

(2) Sredstva iz prethodnog Stava dodjeljuju se u vidu novčane pomoći (U daljem tekstu: Pomoć).

(3) Pomoć se članu Udruženja može odobriti samo jednom u toku kalendarske godine i to samo po jednom od osnova iz Stava (1) ovog Člana.

Član 7.

(1) Pravo na pomoć članu Udruženja na temelju zdravstvene ugroženosti može se tražiti u slučajevima: iznenadne i teške bolesti, bolesti koja zahtjeva skupo liječenje ili hirurški zahvat, bolesti koja zahtjeva kupovinu ortopedskih pomagala.

(2) Zahtjev za pomoć iz Fonda na temelju zdravstvene ugroženosti se podnosi u pisanoj formi koja, između ostalog, sadrži: preciznu dijagnozu sa potpisom i pečatom ljekara specijaliste, stručno mišljenje ljekara o težini oboljenja, prognozu razvoja i eventualnog izlječenja bolesti, ne stariju od 6 mjeseci.

Član 8.

(1) Pravo na pomoć članu Udruženja na temelju egzistencijalne ugroženosti može se tražiti ukoliko je član Udruženja nezaposlen, ukoliko je prihod koji ostvaruje manji od iznosa novčane socijalne pomoći na nivou Bosne i Hercegovine, ukoliko je pomoć potrebna za saniranje i ublažavanje posljedica elementarne nepogode.

(2) Zahtjev za pomoć iz Fonda na temelju egzistencijalne ugroženosti se podnosi u pisanoj formi koja, između ostalog, sadrži: potvrdu o statusu (potvrda o nezaposlenosti, ček od penzije, rješenje o invalidnini), podatke o ukupnim prihodima i imovini člana, a za slučaj potrebe saniranja i ublažavanja posljedica elementarne nepogode izvještaj nadležne komisije za utvrđivanje nastale štete.

Član 9.

(1) Odluku o dodjeli sredstava iz Fonda na temelju prijedloga komisije za kulturne namjene i komisije za socijalne namjene donosi Upravni odbor.

(2) Nepotpune prijave iz Člana 5. Stava (4) ovog Pravilnika, odnosno prijave koje ne sadrže potrebnu prateću dokumentaciju iz Člana 5. Stava (5) ovog Pravilnika, Upravni odbor neće razmatrati. Nepotpune zahtjeve iz Člana 8. i Člana 9. ovog Pravilnika, odnosno zahtjeve koji ne sadrže potrebnu prateću dokumentaciju iz Člana 8. Stava (2) i Člana 9. Stava (2) ovog Pravilnika, Upravni odbor neće razmatrati.

(2) Pri donošenju odluke o raspodjeli sredstava posebno će se voditi računa o:

- ukupnoj masi sredstava koja je u trenutku odlučivanja prikupljena u Fond;
- da se konkursna prijava odnosi na područje umjetničkog i kulturnog stvaralaštva, njegovanja muzičke tradicije, aktivnosti autora, muzičke djelatnosti uopće, vodeći računa o izvrsnosti i kvaliteti, žanrovskoj muzičkoj raznolikosti i regionalnoj zastupljenosti;
- penzionom, zdravstvenom i socijalnom statusu članova Udruženja, vodeći računa o izvrsnosti i kvaliteti, žanrovskoj muzičkoj raznolikosti i regionalnoj zastupljenosti.

(3) Odluka Upravnog odbora je konačna.

Član 10.

- (1) Krajnji rok za realizaciju programa/projekta je 30. novembar naredne (ili tekuće) godine.
 - (2) Rok za pravdanje troškova realizacije programa/projekata je 31. decembar naredne (ili tekuće) godine.
 - (3) Ukoliko podnosilac programa/projekta do 31. decembra naredne (ili tekuće) godine ne opravda utrošena sredstva, u obavezi je da cjelokupan iznos vrati Udruženju.
 - (4) U slučaju posebno opravdanog i dokazanog razloga, a po dobijenoj odluci Upravnog odbora, može se produžiti navedeni rok.
- Ukoliko podnosilac programa/projekta ne preuzme dobijena sredstva, ne može ih potraživati nakon isteka roka iz stava (1) ovog Člana.

Član 11.

- (1) Sredstva iz Fonda koja nisu utrošena u toku jedne kalendarske godine moguće je prenijeti na sljedeću godinu.
- (2) Upravni odbor preostala sredstva može usmjeriti u namjene predviđene ovim Pravilnikom.

Član 12.

- (1) U slučaju smrti člana Udruženja, isplata novčanih sredstava na ime pomoći najbližim članovima njegove porodice vrši se iz Fonda.
- (2) Maksimalan iznos sredstava iz Stava (1) ovog člana je 2.000 KM netto.
- (3) Odluku o visini sredstava iz Stava (2) ovog Člana donosi Upravni odbor.
- (4) Novčana pomoć iz Stava (1) ovog Člana za maloljetno dijete preminulog člana Udruženja isplaćuje se mjesečno, sve do početka školovanja djeteta, u iznosu od 200 KM netto.
- (5) S početkom školovanja djeteta, pomoć iz prethodnog Stava isplaćuje se u vidu stipendije, sve do kraja obrazovnog ciklusa.

Član 13.

Ovaj Pravilnik stupa na snagu danom donošenja a potvrđuje ga Skupština Udruženja.

Broj: P-02-10/15
U Sarajevu, 06.10.2015



v.d. Predsjednika Upravnog odbora

Amir Šehić